



崑崙山房詩集殘稿

淄川 張篤慶 歷友

七言近體

十里望 平原北村名 壬戌

平原舊是古齊州有客蕭條曳敝裘
草樹煙迷十里望魚龍春斷九河流
天連大澤吞平野路入寒塘背小洲
薊北征途猶未半黃塵漠漠旅人愁

督亢亭

督亢陂前督亢亭荆卿西去入秦庭
孤忠自貫虹霓白七首常留天地青
春滿華陽人寂寂風高易水自冥冥

空餘遺恨悲千古燕市南頭酒易醒

初入都門

千里東風向帝京自憐無路到承明
桃花莫問元都觀麗日常懸紫禁城
旅食尙爲彈鋏客入關難作棄繻生
楊雄豈有長楊賦回首雲亭空復情

送焦司馬石虹先生奉使中州祭伏羲陵

萬里金甌海水澄明禋巨典重臣膺
星輶暮宿華陽館雲氣春深太昊陵
使者自虔三禩禮祠官遙供九微燈
中州自古多形勝攬轡山河意氣增

贈河池州別駕牛衡璞其尊君曾爲瓊州太守

五馬珠崖舊有名分符此際又長征
日南亦是三苗地江外猶爲百粵行
客裏雲帆過荔浦天邊竹馬接金城
佩刀萬里無須嘆臥治行將召汲生

長安道

長安道狹不容車駑馬歸來日欲斜
萍跡依然仍作我錦城何似早還家
華陽擊筑狂奴醉歷下看山驛路賒
短褐豈緣羞七貴風塵潦倒畏驚沙

慰訥菴公車下第

我來回首渡桑乾值爾雲霄鍛羽翰
計吏誰能憐趙壹上書猶未報嚴安
旗亭命酒人初醉碣石談經意已闌

笑折楊枝共歸去繡江江畔有魚竿

都門未及晤司成阮亭先生

北李南陳又見君欲從兩序辨鏞鼗金臺天濶方求駿
石鼓雲寒正校文海畔經年疎問訊日邊咫尺尙離羣
獨憐憔悴京華客千里遙歸孝水濱

倉猝南歸未得過惺崖太史一晤

幾年尺素向蒿萊此日遙來易水隈憐我披裘碣石館
聞君揮翰柏梁臺鳳城楊柳思歸急海國漁樵繫夢回
金馬門前知不遠征車無那已頻催

同訥菴出都又書此奉慰

與爾南歸路渺漫薊門行李亦闌跚太平此去容高臥
痛哭何勞策治安天遠禁城瞻斗極雲迴絕塞抱桑乾
盛朝豈有劉司戶莫漫狂歌行路難

盧溝河北尋張華宅不見

吾家博物數司空故里荒涼未易逢縱有琅環三十乘
那堪典午百年中延津龍劍淪寒水宛俗衣冠逐曉風
自是銷沉千古事銅銘荆棘恨何窮

河間道中

村落荒涼意黯然瀛洲郭外草芊芊濁流是水皆歸海
遠樹無山欲接天雨後春畦初漾綠風前官柳已含煙

九河故道今何在應有遺墟父老傳

自署雲高洞隱者

洞門一帶氣冥冥雨過陰崖石骨青
自向空岩稱大隱漫勞草檄借山靈
南谿樹色迷孤杖西嶺煙霞積翠屏
若問客星何處是碧雲十丈護巖扃

山村

十畝山田鳥道斜傍岩疊石長桑麻
終年老屋隣青巘落日空山散彩霞
汲水人歸天外嶺放衙蜂繞磻前花
雲高洞裡如相問便是般陽處士家

兔峪漫興

古道迷離蔓草繁尋幽往往憇山根
千林碧樹客雙屐十里青天見一門
寂寂蓬蒿真作主寥寥雞犬自成村
深憐遠汲農夫苦欲向山靈乞水源

再過雲高洞用前韻

靈境無人草樹繁漫携藜杖躡雲根
龍蟠薜荔當山口鳥帶煙霞過洞門
幸有胡麻堪一飯每來樵路失孤村
疏泉築室他年事高臥空岩證道源
長林灌木一何繁青壁峻嶒露石根
澗外花香通地肺洞中雲氣接天門
喜看黃鳥鳴幽谷只少清溪抱遠村
種得碧桃千萬樹重來應否似桃源

初稿

證

遊長白山歸

青藜紅樹一躋攀馬首吟鞭去復還
柳市也應留世上桃源端合在人間
哀泉落葉風初定錦石秋花意自閑
此日勝遊雖未厭重來已是識廬山

未得與梅耦長話別

獨惜離觴酒未傾至今猶憶謝宣城
鄉心已逐三江水落日長懸萬里情
路入峭湖淹客夢雲連楚樹引歸程
遙思繫纜雙橋畔獨坐昭亭月正明

吳海木為余作燕遊草序

潦倒風塵百感生浪遊落落少逢迎
獨憐擊筑尋燕市

豈有雄篇擬帝京歸路鶯花寒食節
高齋琴酒故人情十年未就三都賦
尤晏先生序已成

壬戌之秋七月既望泛舟西溪詩

是東坡先生前遊壁日也紫霞

先生命題

人間甲子不過須臾際此良宵欲追盛事生年
不滿百何勞千歲繁憂對影可成三亦有雙樽
雅會昔賢遷謫尚爾尋歡吾輩平居去何不樂
眼前蠻觸便是曹周世上浮名不堪轉瞬見清
風其如故臨素波而依然序屬中元時維既望
山中有曆日初經壬戌之年物候盡知時輒感

秋蟲之籟孝河之水三尺力始勝舟豐岫之月
一輪光能鑿髮爰具舩艦用寄蜉蝣共舉匏樽
欣浮醴醪青山水國宛在中流赤壁火攻乃出
下策古人不見我風景何殊萬事不如盃醉醒
皆適高司寇公曰是可遊也賦則續貂不如詩
以言志耳

煙波深處泛輕舟桂櫂平臨孝水頭大地有情皆赤壁
人間無處不黃州清風又到蘆花岸明月常懸杜若洲
終古風流應未絕眉山口許續良遊

極目寒溪正落潮銀沙碧藻木蘭橈扁舟一葉同今古

月

兩賦千年慰寂寥天地蘧廬真逆旅江山清夢寄漁樵
也須痛飲酬明月可有閑口弄玉簫

裏口東來望武昌孝河左顧是般陽千年詩酒稱知己
兩地山川共渺茫莫漫臨江傷魏武但能顧曲卽周郎
惟應羽化乘風去只在蒹葭水一方

賦得是歲十月之望

先是外舅高司寇公有壬戌之秋七月旣望泛
舟西溪之會以續赤壁良遊一時屬和甚盛今
茲十月之望則又蘇長公賦後赤壁時也不可
無遊亦不可無詩予復得三草以廣其意

當年逸興幾曾無絕代風流繼大蘇十里月明飛木葉
一灣流水卽江湖請看滄海新詩伯何減黃州舊酒徒
便欲重遊須盡醉溪頭應有四腮鱸
逸客行歌百不憂溪山無恙水悠悠千秋盛蹟黃泥坂
此夜追歡青翰舟孤鶴夢中雲氣幻馮夷宮上月輪浮
君看携酒臨臯路不爲前遊阻後遊
載酒堂應是雪堂載將斗酒泝流光青溪明月誰爲主
紅葉蘆花別有鄉詞賦多情追屈宋山川過眼等彭殤
驚風斷岸聞長嘯野客偏宜上野航

鳧子齋中賞菊

清齋樽酒泛流霞坐聽神絃隔絳紗四坐何人同白眼
三秋幾日對黃花慚非北海高軒客且醉東籬處士家
華髮星星今漸逼當歌誰不惜年華

聞歌有贈

凌波逸唱轉新聲燈下低歌塞上行乍入鳳簫方按拍
轉籠雁柱坐鳴箏芳塵畫棟聞鶻燕弱柳金隄聽乳鶯
今夕銷魂何限意哀絲豪竹總移情
輕雲不動起香塵花裏聞歌意態真不分延年誇北地
多情宋玉是東鄰朱絃嫋嫋應憐汝羅袖垂垂欲拂臣
莫漫樽前惜沉醉明朝疑作夢中人

翠屏紅燭照華茵銀甲調絃懊惱人張翰情多歌小史
雪兒年少是前身當筵宛轉黃金縷按拍輕盈白苧巾
一曲清商淒切甚可知家世近西秦

弔焦蔚若武孝廉

蔚若母以未葬令子陵侯先一年遊

愛客當年陳孟公飛揚意氣本豪雄士行有母歌虞殯
伯道無兒隕蕙叢殘柳門前悲落日干將匣裏吼晴虹
劇憐投轄相逢處班馬西來泣晚風
共說朱家意氣深茫茫天道故相侵縱饒自抱千秋恨
未死生平一片心延水消沉飛紫電夷門然諾重黃金
如雲賓客今何在絮酒空堂淚滿襟

題蒲柳泉聊齋志異卷後

冥搜鎮日一編中多少幽魂曉夢通五夜燃犀探秘錄
十年縱博借神叢董狐豈獨人倫鑑千寶真傳造化功
常笑阮家無鬼論愁雲颯颯起悲風

盧家冥會自依稀金盃千年有是非莫向西陽矜雜俎
還從禹穴問靈威臨風木葉山魈下研露空庭野鶴飛
君自閉人堪說鬼季龍鷗鳥欲相依

搦管蕭蕭冷月斜漆燈射影走金蛇琅嬛洞裏傳千載
嵩嶽雲中迸九華但使後庭歌玉樹不勞前席問長沙
莊周漫說徐無鬼惠子書成已滿車

姿

孤

壽

歷下寒食阻雨未得出遊

癸亥三十七首

春陰風景似殘秋萬柳微黃綠漸稠安得青藜探勝地
未同畫鷁泛清流那堪寒食愁中度誰道湖山望裏收
旅館蕭蕭今夜雨良辰端只負良遊

去歲長安逐曉風今年寒食旅愁同心懸華嶠浮雲外
春在明湖細雨中蘆葉已看抽嫩綠桃花何處覓殘紅
安能倚杖丹梯上放眼諸天萬慮空

去年寒食客都中

送溧水文少尹

由學博升任

十年苜蓿縮銅章安定由來姓字香湖上故人臨祖帳
江東父老盼桐鄉清齋暫輟琴書韻案牘何妨雁鷺行

共說文翁能化俗溧陽雲樹遠蒼茫

送董少府之陝西任

藍田故事共花封回首離堂別思濃繁露千秋稱絕調
秦雲萬里對雙松囊琴夙志推清獻馴雉今初佐魯恭
指日博陵聞奏最中朝前席闢銅龍

歷下贈孫西山由萊蕪廣文轉萊郡教授

十載寒氊伴魯儒清貧人比范萊蕪卽看劍佩來齊郡
指日琴書傍海隅經術有人思鹿洞冷官何地不鵝湖
鱸堂借問孫明復處處臯比亮不殊

慰譚無競小試失利兼示式九川如諸弟

崑

膝

卷

七

民釜雷鳴自古今千秋絕調共傷心劉蕡漫說文章好
賈誼徒勞太息深下里何堪歌白雪世情原自重黃金
與君同作違時客抱膝聊爲梁甫吟

十年閉戶著潛夫老我青山一腐儒繁響笑看同燕石
暗投何必不明珠劇憐楚客猶懷璧誰向齊門競鼓竽
季子歸來蕭瑟甚焚書莫漫感窮途

浮沉濁世盡吾曹豈是江淹少彩毫感遇自傷鵬鳥賦
逢時羞作鬱輪袍但存綠綺音堪賞莫說黃□□□□
□□鐘期千古恨清商愁絕向誰操

敝盡貂裘未是貧虞翻骨相本來屯連城有日高聲價

按劍何勞辨假真狗監識人原不惡蛾眉入戶自生嗔
輞川兄弟多寥落采采湘蘭未可紉
牡丹雖好亦塗鴉看買臙脂祇自嗟絕世便應淪北地
含顰誰復効東家細腰餓死終何益高髻承恩未足誇
不必牢騷悲老大還期努力愛春華

送魏孟宣之任金城

久識談經有彩毫分符百里向臨洮地連紫塞秦關遠
天轉黃河漢月高沙苑夏雲生苜蓿琴堂秋雨薦葡萄
雲中魏向真良牧前席行看異數褒

寒擅十載望金莖此日銅魚下帝京長劍切雲過魯甸

雙旌指日度秦城關西父老嗟何慕稷下交遊帳別情
洸水政成知不遠笑看嚴助入承明

魏曲阜人由廣文升任

漁父辭

風塵何處問三閭桂楫蘭橈自卜居殊錫初為五湖長
生涯已付半江漁中流不避青蒲劍下澤何勞白板車
獨向煙波稱釣叟側身天地總蘧廬

澣山埠漫興八首

是年湖水最大

平蕪麥浪碧含煙駐馬高吟落日前白兔山中雲出岫
青陽道上水連天風迴鶯羽啼宮柳人去鷓鴣立釣船
安得青帘容我醉狂夫豈少杖頭錢

會仙峯下卽丹丘勝地不臨杜若洲日照金蛇湖畔水
波搖玉盃鏡中流林邊快得凭高路村口仍多不繫舟
羨殺漁翁塵外客賣魚沽酒向壚頭

十年遊事與心違慚愧滄洲薜荔衣楊柳橋斜行子渡
蒹葭風急釣船歸望窮遠水天垂盡路入橫塘鳥亂飛
未得中流乘一席湖心辜負鱖魚肥

汀洲細草發華滋沅芷湘蘭有所思山色遙看青鬣隸
湖光遠映碧琉璃柳綿飛雪侵漁父蘆葉抽戈護雁兒
拂拭蒼苔成獨往流連清景賦歸遲

燕南趙北旅人情一樣湖光浸太清折柳征人回馬首

當墟少婦賣魚羹雲垂碧落三山遠天入中流十里平
彷彿去年瀛海畔寒波如練月中行

去年過趙北口風景與此地相類

翠微南望甯斜暉拂石停鞭坐釣磯芳草多情縈客轡
柳絲無力上人衣滄波萬頃空濛裏白鳥一行高下飛
如此風光良不惡漢陰我亦欲忘機

蘆花為岸水為城斷續遙聞雁鷺鳴映日夏雲無定質
當湖返照有餘清煙村雞犬堪圖畫澤國漁樵遠世情
誰向滄浪塵慮盡招將鷗鷺與同盟

何來雙漿出晴沙天際孤雲逐去槎客子循湖渾漫興
居人傍水自為家園蔬白小荆成藿菰葉青泥玉有芽

笑指吟鞭正西路夕陽一片拂紅霞

雨中宿載績先生綽然堂讀紀遊詩餘喜與韋仲

留仙劇談竟夜

驚飈十里望漫漫海立雲垂行路難驅馬蕭條山色晚
入門浙瀝雨聲寒烏衣邸第人如玉白雪歌辭氣若蘭
更愛蒲衣頻握手長吟不惜夜將闌

積雨陽正大水

三尺平添曲水池陽侯狂漲繡江湄東坡未作秋陽賦
摩詰空吟積雨詩滿地蒼苔侵石砌千村濁浪捲茅茨
幾多無食薪如桂正是蝸牛得意時

賦

香

侯

閏六月望日立秋賞月於焦立菴先生之露園聽
歌醉賦

投轄留賓竟不歸名園鄴下鬪芳菲當歌醉聽紅牙板
入夜涼生白苧衣露濕明河千里淡月來深樹一塵稀
碧天如洗緣何事過在行雲不遣飛

良遊秉燭暢幽情花下低歌按鳳笙對酒同為河朔飲
當筵又唱孟門行滿林碧樹流寒翠半畝紅蕖落絳英
此夜追歡應記取醉耕堂上一輪明

客中七夕

借問黃姑歸不歸含情脈脈自依稀金天霜冷星駟近

意

銀漢秋高露氣微萬里西風烏鵲渡半輪斜月彩雲飛
故園兒女金盤會望斷蒼茫織錦機

年年此際暮雲昏牽惹羈人亦斷魂闐闐含愁縈曉夢
玉繩低度識天恩星橋無恙傳千載霄漢何由乞一言
守拙自慙悲老大茫茫我欲問天孫

九天風露玉階青一水盈盈帝子靈璇室宮中逢七夕
長生殿裏誓雙星漢津結珮浮雲蔽機上流黃夜月停
翻恐洗車窗外雨天涯遊子不堪聽

團扇風前望女牛支機石畔碧雲流人間亦有傷離別
天上何勞怨素秋一水迢迢鄰漢渚千家燈火傍針樓

窗 意 意

乘槎自是吾家事欲溯河源作蹇修

聞王師進征臺灣克取澎湖

九重南顧尚踟躕萬里鯨波尺水枯自有長纆收百粵
不勞輸輓困三吳戈船蹙浪翻龍窟橫海登壇佩虎符
昨日羽書飛露布王師六月取澎湖

幕府征南亦 聖恩從教雨露淨乾坤爭傳貫甲趨漳

浦指日軍書報廈門徼外樓船兵氣合溟南窮島陣雲

昏漢家天子稱神武黃屋終當奉至尊

年來逋寇遁臺灣 聖主宵衣塵玉顏下瀨橫戈方奏

凱昆明習戰幾曾閑龍濤夜吼沙中島蜃氣煙銷海上

山籌餉猶煩司戶計新膺廟算紫宸班

上諭戶部特遣重臣督餉

送吳海木返武林

南音淒切賦歸歟越客經時憶故廬湖畔久虛三尺觚

柳塘還擁百城書寒郊背郭愁分手促席行觴自翦蔬

他日鳴鞭趨薊北更期海上訊樵漁

讀孫孟滋光祿新詩次韻奉寄

陸沉金馬未全非小隱青山且莫歸但效阮公聊復醉
休從曼倩自言饑日邊坐索長安米海畔何勞薜荔衣
共道贊皇承世業生平志不在輕肥

清時珂里借才賢暫向天厨擊小鮮尚食自從春殿外

首

含香時拂御筵前
蔗漿却暑何人見
法酒沾衣讓爾先
苦憶西樓明月夜
鳴箏沉醉自年年

閉關老我少微星
皂帽棲遲似管寧
中夜悲歌彈劍鋏
三秋清夢伴園丁
嬾雲怱怱還侵榻
落木蕭蕭自滿庭
天上故人勞問訊
他時塵外覓紫扃

江籬沅芷隱靈修
媿爾京華賦壯遊
鳳嶺久閉青竹杖
般溪無恙木蘭舟
尚方自是推光祿
羊胃由來亦拜侯
五斗朝天堪一醉
金門割肉未云差

吳海木自山左歸
錢塘更名陳琰以冠軍采芹

甲子十六首

驪歌回首菊花村
今日雙魚下稷門
詩冠昆明真國器
名傳張祿亦君恩
江干破浪長風遠
海上交遊古道存
遙想稱觴趨綵服
錦堂麗日照晴萱

五服泉道上

十載傳經髻欲斑
紅塵蹀躞去仍還
魚翻晴浪依深磧
馬度春雲上遠山
斜日人歸青草渡
落花風起綠楊灣
買山期遂巢由願
蘿薜叢中好閉關

寄懷焦簡菴

鳳城楊柳又青青
回首同遊憶渺冥
笑傲久虛三語掾
風塵未覩五侯鯖
西園誰不王粲東國
余今似管寧

千里懷人蕭瑟甚
海棠花下坐談經

杜九畹移居山中

仙源聞道好桑麻
碧嶂清溪似若耶
康伯由來能避世
葛洪端只愛移家
雲中雞犬隨丹竈
林下綦巾挽鹿車
借問買山何所事
可能隨意臥煙霞

贈歌兒小鳳

惆悵樽前唱羽衣
臨邛遮莫怨金徽
難忘采翮乘蕭史
愁對驚鴻憶洛姬
梧苑風來知不遠
丹山春老送將歸
青溪坐愛神絃曲
莫遣行雲處處飛
明離寶帳亦珊珊
百斛珠光落玉盤
香霧似迴青爵觀

霓裳欲墮彩雲端
漢宮掌上風初動
秦女樓頭月正寒
莫漫蕭蕭賦歸去
瑤池新種碧琅玕

聞廷臣有上書請封禪者

年來聖主坐垂衣
何事封章拜瑣闈
泰岱呼嵩真過計
漢皇瘞玉自依稀
漫勞侍從誇三賦
豈少材官控六飛
但得普天多雨露
明堂不必駐雲旂

喜得任待菴辰旦給事諫止封禪疏

黃門烈烈自陳書
止輦風高動玉除
共愛登封多侍從
何期諫獵有相如
雲迴孤鳳翔天闕
曉闢雙龍引帝裾
仗馬不鳴今已久
青蒲抗疏重欷歔

挽施愚山夫子次梅耦長韵六首

湖海雙旌廿載餘，鳳凰池上應徵車。生憎司馬言封禪，共識中郎有秘書。詩卷長留東海畔，相才空向北門儲。先生遲暮稱遭遇，豈是湘潭怨卜居。

恩深國士恨，縣縣濟水春風。七十泉歷下，聲光真不朽。中原旗鼓更誰賢，稷門父老悲今日。魯國諸生憶往年，自是招魂同宋玉。問天欲賦七哀篇。

先生視學山左時，余以髫年一詩入

縣最曾從稷嗣君，大明湖上見雄文。二東霸氣齊風壯，千里龍濤海色分。春雪傳經依鹿洞，秋風侍從濟河汾。

桓譚舊是立亭客，寂寞青燈哭子雲。

先生督學山左有觀海集為江右監

司修復白鷺書院

玉尺親携出漢廷，中州雅調奉昭亭。入朝老作文章伯，

吏隱光沉處士星。夢斷燕雲迷易水，魂歸楚澤泣湘靈。

石湖舊恨今相及，拂拭遺文涕泗零。

先生辛酉典試中州，又嘗為邢孟

貞搜輯遺文

鐵骨冰心世所憎，金門晚歲見飛騰。共傳索米同方朔，

猶喜生兒過景升。九辨哀歌傷楚客，千秋片石寄韓陵。

當年絳帳承顏色，南郡生徒嘆不勝。

歷不至今先生碑版甚多

山陽笛裏悄無隣，岱北重來幾度春。碣署滄溟留古道，

樓空白雪怨騷人宣城此日初銷歇正始從誰辨假真

花發西州千萬樹羊曇痛哭見交親末句指楊長

寄梅耦長時居憂宣城時以挽愚山先生詩生詩來徵和章

南天不見一鴻飛三載傷離尺素稀海畔交遊留玉珮

江干血淚濕麻衣八哀賦就湘雲泣九辯吟成薤露晞

河上神君為寄語城頭姑射待人歸

歷下晤肖巖弟時讀禮家君

大明湖上百踟躕意氣相看慘不舒岐路憐余同阮藉

麻衣念爾似臯魚南山憔悴應長痛北闕淹留未上書

欲向清齊問雙鶴白雲迢遞士行廬

哭焦司徒石虹先生十首 乙丑二十一首

落日陰陰哭寢門那堪極目海雲昏孤幃千里悲鄉國

一歲三遷憶聖恩繡被蔥靈馳北郡溫明秘器賜東

園他時何限羊曇淚腸斷青山太傳墩

昆明幾載陣雲開樞府煌煌令似雷曉奏一聲朱鷺曲

夜吟七字柏梁臺乾清侍講聞天語微省承恩列上台

今日老成凋謝後山丘零落使人哀公為少司馬最久

當時烽火接南荒聖主宵衣坐未央已見羽書飛露

布漸看鏡吹返江鄉洗兵倒挽天河水偃武重開日月

光祇是乞身歸未得至今遺恨午橋莊陳苟交誼耿難

念十載憐余兩鬢霜忍使招魂萬里曲回思小隊浣花
莊中朝棟折人三嘆國士恩深淚萬行執手哀哀憐未
婢芳蘭憔悴暗神傷

北望燕雲櫪馬驚列星已殞鳳凰城程書常自勤中夜
盡瘁真傳答 聖明三殿羽千飛彩鳳十年滇海偃長
鯨傷心千古勞臣恨猶向彌留計水衡漢庭計相重持
籌扶病仍聞拜冕旒自有龍鱗頒少府誰携馬策哭西
州素車慘淡來三輔丹旄淒涼擁八騶食少事煩終古
恨令人長痛武鄉侯

一鑑淪亾 聖主悲廟堂優恤重淒其黃腸題湊皆恩

擇甲士輕車夾路達哀誅爭傳牛馬走玉音又下鳳凰

池平泉蜜客頻揮淚處處俱為峴首碑公昇平嘉宴詩有天河洗甲通

蠻卿之句

入哀淒切不堪聞開篋惟餘白練裘曾為文章推杜牧

每從下第惜劉蕡三年薊北懷魚素五夜悲歌痛海雲

豈獨感恩長太春春聲寂寂繡江濱余去年失意公自燕臺以書見慰

回憶中州太昊祠長風獵獵引龍旗雙旌曉渡黃河水

木傳春歸碧海湄雲散日邊方馭鶴夢迴天上已乘箕

故鄉父老皆長嘆不似當年過里時

前年匹馬向燕畿猶記含香下鎖幃驛路乍啣雙鳳出

祠官真馭六龍飛西園風物猶如故東閣繁花已漸非

隕涕柏陵城下路回頭萬事與心違

壬戌春公奉使中州便道過里

秋懷八首次孫孝堪光祿韻

遁世常携五嶽圖登高隨處卽蓬壺天寒大澤龍蛇遠

秋到漁梁雁鶩呼感舊三年來尺素懷人千里望平蕪

劇憐紅柏橋頭路露宿霜啼夜夜烏

蕭瑟淮南桂樹幽避人高臥海雲樓齊門鼓瑟悲遲暮

楚客傷離怨素秋自有羣公調玉燭何煩野老頒金甌

年來龍劍渾搖落莫向豐城望斗牛

百尺綸竿二十魚秋山影裏命中車偶緣佳客時招鶴

豈爲窮愁漫著書流水有情彈賀若凌雲無路問相如

十年寥落空長鋏羞向朱門曳敝裾

長嘯蘇門阮嗣宗一林綠樹碧苔封常因采菊開三徑

每爲看雲踏亂峯八座霜寒秋搗練隔溪風定夜聞鐘

邇來卜築桃源外知在煙霞弟幾重

嵩呼嚮落碧雲間去歲登封向泰山十萬羽林屯豹尾

千官鵠立候龍顏金泥玉簡應如故漢柏秦松上可攀

共喜普天施雨露秣陵旌節渡江還

極目商飈一雁飛暮雲千里甯斜暉霜林落葉人初病

銀漢停梭客未歸般水夢迴鷗鷺渚繡江秋老芰荷衣

何時一為逃塵網獨坐滄洲碧石磯

去年駕幸奉高南至白下

西園遊侶意悲涼回首南皮重自傷九辯微吟天莫問

八哀一賦淚沾裳香山讌罷思遺老古驛人歸哭鄭莊

憔悴當年張緒在不堪重說永豐坊

谷口年來鄭子莊一簑一笠自垂綸海雲伴我棲貞嶠

燕市憑君問酒人西曲鶻絲樓外月東夢魚袋夢中身

輞川握手何年事不為離郡亦愴神

此首為焦司徒公作

題歷下師長人酌突泉恭侍

御書紀事卷後

爭傳羽駕向崆峒只在平陵小市東宸翰喜看留勝蹟

溫泉從此象離宮儒克倖列期門上鷺序遙連豹尾中

賦就長楊真不忝射熊何但數揚雄

依飛夾道出城闈輦路爭看紫翠分共道軒皇尋赤水

寧如漢武燕河汾三驅玉輅來千里一字天章下五雲

咫尺聖顏應獻賦無煩狗監薦雄文琳瑯天語被春

溫翠輦來深灤水源仗下千牛鳴玉珮雲邊八駿捧金

根揮毫睿草飛鸞羽授簡儒臣似兔園應是玉皇香案

吏一時顧盼識君恩城南韋杜覲天威尺五階前擬

紫微彩仗竟容縫腋士紅雲近拂薜蘿衣崑池帳殿傳

千載瀟水材官控六飛為語明湖諸父老今朝真奉御

顏歸

御書激滯二大字

歷下贈德州田子益

丙寅四十首

桃花時節雨霏霏君念潘輿苦憶歸綠柳半牽遊子夢
紅塵留滯老萊衣看雲湖上頻西望聞雁風前正北飛
他日相尋過衛水孟嘗門下想依稀

歷下送田樂園歸德水

共道君家不可當今朝送爾上河梁函山日暮螺紋碧
湖水春生荇帶長薊北驂騮馳驥足江東門第接鴛行
莫愁此別音塵隔千里題詩寄鄭莊悲歌拔劍倚湖天
鄴下材名似昔年五夜同歌三婦艷千秋抵掌一樽前
伯倫醉後君能恕沈約吟成我亦憐漫賦驪駒添別恨
萋萋芳草正無邊

平原董年伯携家醞共飲田子益旅齋

歷下相過此勝遊芙蓉橋下水西流卽看共醉清霄月
更有何人不解愁談劇自浮鸚鵡蓋春寒猶戀鷓鴣裘
留髡一石頻傾倒豈是平原舊督郵

聽董年伯子均先生談其素園之勝豫題此詩

聞道芳園自闢疆何時一度赤城梁羅浮香散梅花外
馬頰波廻柳市旁選勝未窺斤竹嶺題詩早寄午橋莊
太丘爲念荀家子十日平原好泛觴

丙寅過龍山驛和壁間豹岩太史甲寅留題

先生早謝進賢冠到處題詩落日前
元亮黃花開小徑
滄溟白雪在林泉
旗亭畫壁傳千古
旅館停驂已十年
拂拭塵封成一笑
啣盃獨對暮雲天

龍山壁間和表兄韓夢懷舊日留題時作邑遼陽
龍山古驛促歸鞭
回憶鳩車竹馬牛
仙吏正成猶有待
關河路遠意淒然
華峯日照三春樹
遼海雲迷萬里天
何日彤墀聞內召
妻驢自控好誰憐

憶雲間蔣大鴻先生

杜陵遺老蔣元卿
到處逢人識姓名
劫火秦餘留圯下
終身漢臘憶咸京
中原風雅推前輩
湖海論交托友生

一自北樓貽錦字
十年漂泊夢魂驚

寄毛大可太史于越中

當時招隱士蓬瀛
賦就璇璣帝座驚
已見昆池開帳殿
如何巖助厭承明
待臣洗沐辭青瑣
天子恩深賜玉羹
却望金莖霄漢上
可無回憶鳳凰城

吳均書札下天隅
聞道先生乞鑑湖
放鶴西泠尋處士
懷人東海問潛夫
青藜暫爾留天祿
白眼依然傍酒壚
當日終童今老大
應憐遲暮在窮途

時太史倩吳海木寓書見訓

曲江樓畔憶清吟
老父生平訂素心
千里論交疎問訊
十年錦字久浮沉
東尋巢父滄浪濶
南去嚴陵雨雪深

燕市和歌吾有願倦遊何事已抽簪

不堪回首舊童烏玄晏當年識故吾自昔浪傳歌七發

至今猶未賦三都滄溟人去音誰知白雲樓空調亦孤

却怪先生漫歸隱中原雅道久榛蕪

先生與家嚴訂交吳越間

聞說驅車渤海濱冶園秋老問平津香山珠履留芳讌

綠野珊瑚拂釣綸北海一樽六從事南國千里七香輪

如何咫尺營丘道不向般溪訪隱淪

十年供奉府中趨此日思歸浙水隅豈為楊朱在岐路

真如李白戀江湖金門罷索長安米玉佩新停照夜珠

翻恐御顏頻顧問蒲輪依舊下雲衢

治園益都馮相國園也

張南溟中丞脩復白雪書院會文講學余以病未

赴

睿藻前年出紫微激湍千頃漾珠璣樓高白雪歲蕤下

地近清溪水鶴飛名士風流追大雅元戎小隊傍漁磯

病夫望斷滄溪里郢曲由來和者稀

寄邢陶山兼託肖巖弟

百花洲上百花春爛醉君家月一輪常憶入林逢阮籍

每因投轄怨陳遵滄溟絕調今非昔白首交情老更真

為問豪遊燕趙客何時歸向嵒湖濱

繡江晚行

寒鴉亂落夕陽昏西望郡峯積翠痕一曲平橋通野寺
幾行疎柳帶江村城連近郭雲隨馬路入寒塘客到門
迢遞征塵何太苦已看新月上南軒

鍾聖與命作鍾憲副年伯遺詩跋詩

五陵人物說元常當日登壇久擅場海國文章歸絳帳
桐園風雨寄青箱豈因禪草留遺草却使桐鄉作故鄉
太息伯通橋下路五噫歌罷黯神傷

安靜子至歷下爲鍾憲副年伯遺詩作序余讀之

有感

昔時錦字到林泉此日函山踏亂煙勝侶自臨湖水畔
故人愁絕海雲邊中原耆舊存風雅歷下交遊憶往日
猶有遺文鍾太傅摩挲自勒青編

譚無競讀書山寺

禪房篝火夜燈明憐爾休文太瘦生三寸齋鹽忘世味
六時鍾聲帶秋聲歸雲絕壑無人跡落日空山一鳥鳴
珍重希文憂樂意醴泉西望有餘情

貧

由來南阮本家貧攢鼻長竿且做顰每痊車船延五鬼
何勞錦繡擁千純爲園先闢移花地留客時傾漉酒巾
自署新銜清絕甚羲皇以上萬天民

秋思

清冷孤館曉寒侵倦鳥棲遲憶舊林落葉哀吟秋颯颯
濕雲掩映畫陰陰蒹葭南浦生離恨蟋蟀西堂動旅心
百里何堪望天末故園鄉信久浮沉

贈畫史高子常

解衣盤礴自飛揚慘淡經營亦不妨天壤誰如吳道子
人間今見顧長康丹青瀟灑滄洲意縑素嬉遊翰墨場
念我端宜丘壑裏便應圖向澆花莊

西溪

野燒微微白草荒漸青寒鳥下枯桑一行衰柳橫秋色
十里明霞映夕陽古岸溪廻人渡水漁梁潮落雁啼霜
漢陰我亦忘機叟抱甕晴郊興自長

送馮少府還晉中

風流何處不天涯彭澤年來罷放衙八口棲遲常作客
一官寥落久爲家臨岐南浦悲芳草到日東籬嘆落花
回首竹溪知己渺雲山漠漠隔煙霞

采蕪朱烈婦魏氏挽章

天荒地老怨湘川苦竹成斑泣楚天志潔冰壺縈素魄
恨隨秋月墮虞淵青陵氣結何辭死紫玉魂歸欲化煙
慷慨爲歌黃鵠曲傷心宛頸一潛然

終古傷心別鶴操
梅花香散冷雲高
杜鵑帶血啼明月
精衛啣泥泣海濤
魂斷九京凌碧落
笑看一死等鴻毛
前身應是來南嶽
紡紉釣天擁節旄

贈張石年邑侯

漢室郎官郭細侯
分符昨日下幽州
葉堂月照一雙鶴
海國生雲十二樓
銀綬繽紛頽紫閣
玉壺澄澈對清秋
河陽自有花千樹
笑折花枝當酒籌

許山埠湖上

客子東國問旅程
舊遊湖上有餘情
避人白鳥雙飛去
映水紅霞一片明
樹隱孤村知有路
魚依寒藻靜無聲

到來十里層冰合
萬頃玻璃接太清

湖上卽事

時脩小清河

小清河在此湖邊
幕府煌煌號令傳
畚插萬人來水國
桑麻千頃沒虛淵
行河使者脩厨傳
司戶叅軍索酒錢
總爲下流昏墊計
誰知民力正堪憐
中丞謀國計何長
失策還應怨講張
縱使有心悲瓠子
終教無力塞宣防
窮冬暫偃魚龍窟
潦仍淪蟻穴旁
安得湯湯歸海若
三農聊用御憂皇

王舍人莊遇雪

滄溟故里正東歸
白雪樓前雪亂霏
老樹含煙當路立

驚蓬捲地背人飛無邊柳絮方迷目不覺梅花暗入衣
孤館停驂寥落甚暫從貰酒趙青旂

寄孫惑菴光祿

南來雙鯉入煙霞多病潛夫漫自嗟曼倩細君真有倖
步兵法酒亦堪誇西樓明月人千里北極風塵雪萬家
遙想尙方春燕後可能一待故人車

寄韓寧子遼左

昇平今日萬方同帝簡才人尹沛豐露冕遙從平壤北
風符初隸朔雲東雄關千里依遼海鑿輅頻年咏大風
聞道醴泉諸父老已傳昇績建章宮

留別繡江同人

旅人何地不爲家寧向紅塵感歲華白嶽曉風聞霽影
繡江春色到梅花馬嘶紫陌雲縈轡鳥啄青蕪雁弄沙
百里馳驅蕭瑟甚停鞭已是夕陽斜

和畢劍津悼亾詩

僕本恨人兩懼此痛諷咏傷逝能不愴然念潘
岳之多情淒涼持甚覩子荆之一賦伉儷增悲
依韻和歌聊以自遣述懷感舊且寄劍津所云
人間亦有痴于我豈獨傷心是畢生也

白楊衰草傍孤村廿載空招已斷魂天上有情留玉玦

人間無路到松門少翁望斷蘅蕪夢奉倩難銷血淚痕
我亦愁人堪一哭應憐消渴病文園

孫楚多情有所思令人腸斷憶當時白頭吟罷悲無奈
紫玉魂歸去不遲怨入哀絃天地老恨遺孤鶴月明知
安仁今古同惆悵短髮雞皮嘆不支

雙墳寂寞夜臺荒遙枕青溪水氣涼曠野堂封雲慘深
寒郊麥飯月昏黃年華老去人非故兒女情多恨亦長
我欲與君同下淚問天一訴九迴腸

逢山雲鎖爲誰開蘭圃彫零蕙葉催五夜夢中多少恨
三生石上幾曾來北邙回首悲終古南陌傷心賦七哀
太息年來樵梓客常將紅淚洒泉臺

四十五歲除夕

是年生
次子

老大無成意黯然屠蘇久已罷爭先添丁喜作雙兒父
花甲仍虛十五年彈指光陰生白髮半生辛苦累青編
送窮却被窮相戀誰說昌黎不可憐

過德水懷宋紫函田子益尹哉生魏憲武

丁卯五
十首

會通河畔未停輪應怨狂夫老病身京兆田郎初待詔
關門尹喜自無塵信陵執轡思公子宋玉多情賦美人
好待同沾燕市酒華陽潦倒醉殘春

蓀水弔周亞夫

安劉太尉亦忠勤
况復條侯更策勲
共道甘泉停埃火
又聞吳楚淨妖氛
酬庸不借筵前著
堅壁寧同灞上軍
千載餓夫真有相
鄧通空復得明君
文皇拊髀識長城
按轡遙臨細柳營
得士驚看存劇孟
讓兄端不愧元成
奇謀坐致關東捷
勝策全收落下兵
請室莫須長太息
漢家久已薄韓彭

單家橋弔古

滾滾紅塵驛路長
滹沱河畔解輕裝
沿堤禿柳殘春綠
曠野浮雲落日黃
玉璽沉江紅終滅
沒金川問鼎幾廻
翔驚心向夕行人少
此地從來古戰場

力削名藩計已窮
北平王氣最稱雄
論兵漫說姚恭靖
誤國誰憐李景隆
戰骨沉沙悲落日
愁雲折鏃起驚風
朝衣自古歸東市
覆轍齊黃未許同

過河間奉懷宮定山夫子

箕裘此地稱人傑
三世金張入漢庭
北極風雲通帝座
東州人物續滄溟
大明湖上奎文紫
瀛海風前劍氣青
慚愧馬融門下客
春深回首憶傳經

白溝河懷古

白溝河上碧波明
百折東流傍北平
曹國庸奴空假節
王門廝隸解談兵
風沙灘水魚龍鬪
雷雨昆陽虎豹驚

閑數廢興傷往事幽燕自昔是神京

宿三角店

憐我征車似轉蓬馳驅千里向塵中
帝城路近連芳草旅館春寒怯曉風
索米生涯何太苦凌雲詞翰莫言工
漢家不厭揚雄拙早晚長楊賦射熊

入都自嘲

驅馬東風易水濱非因脫粟問平津
市中毛薛仍無恙地下荆高是故人
紫陌誰貽青玉案緇塵中上百綸巾
長安卿相多年少笑我江湖老放民
入都之明日喜晤孫光祿孝園

燕市相逢意倍親共言離別幾經春
聊將錦字三年夢一洗長安十斛塵
繫筑華陽同寄傲談天碣石日爲隣
荆卿若使膺銓敘我輩先當署酒人

崑盧閣遠眺

凭欄極目帝圖雄迴眺皇州雙闕東
禁柳春晴當御道樓臺日麗闢銅龍
觚稜紫翠浮三殿瑞靄氤氳下九重
歷歷長衢車馬客輕塵飛入建章宮

趙壹遙來向漢京却從病渴望金莖
鶯聲曉度千門樹佳氣春深五鳳城
聊復行歌依輓轂何堪無路入承明
登臨徒倚空搔首寥落風塵稷下生

贈惑菴光祿

日邊春盡杏花飛，曼倩金門正苦饑。自請俸錢償酒債，每將弱線補朝衣。輕塵未厭長安道，餘漉微沾內府歸。休沐時吟三婦艷，高堂携瑟自依依。

三月望日入太學過闕

紫禁沉沉象魏尊，黃扉高敞太微垣。九天佳氣生鰲闕，十里飛煙下雉門。北極冠裳侵曉入，東華車馬若雲屯。腐儒釋菜當遲暮，翹首金墀紀聖恩。

都門懷古寧子時為宰蓋平

左傳韓固為馬首大夫

河陽花發最清芬，薦牘蘭臺指日聞。馬首大夫勞下邑，魚頭丞政待神君。風迴九陌鄉關遠，地隔三韓道路分。我不離家為客日，幾迴遙望海東雲。

長安逢萬壽節恭誌

北闕高呼接玉墀，太平人識漢威儀。采摛雲映金支秀，藁萊春生玉樹枝。九陌喜看仙仗入，千官初散珮聲遲。獨憐披褐長安道，不是天階獻賦時。

入太學觀石鼓

壁靡碧泮映宮牆，石鼓離離立雁行。禹鼎豈終淪泗水，元英端合在華陽。虬松蔽日生苔蘚，御道屯雲蔭畫廊。剝日莫言多缺陷，也從沆瀣酌天漿。

髣髴車攻吉日詩天王行狩駐雲旗螭龍久護陳倉道
風雨難消籀史詞北闕衣冠瞻太學西京羽獵想威儀
銘功勒石千年事不是秦皇嶧首碑
終古駢羅兩序旁龍轡斑剝自煌煌久同金掌辭炎漢
豈比銅駝堑洛陽劍佩摩挲三嘆息賁鏞掩映五文章
等閑莫使桐魚扣博物司空亦渺茫

都門喜晤介社聖植班若祖修愚菴子介源洙衆

同年

千里遙來近紫宸鳳城相見倍相親明湖舊約渾如昨
易水行歌調自真莫使貧交羞管鮑肯令膠漆讓雷陳

可堪咫尺浮雲散又作東西南北人

贈澠水郭磨青同年

其曾祖官保公與先相國同年

同作吳門下士君如玉樹照瓊枝已看孔李傳三世

敢謂金張好並馳蘭芷同心思縞帶枌榆相望接淄澠

他時回首長安道應向天涯感別離

接老友家字

帝城花落正蹶躑隄柳三眠葉漸舒祖道回思當二月
他鄉難得是雙魚開緘渾似聞庭訓長跪還如在敝廬
兩字平安真百萬萬金誰說抵家書

歸惶崖宮詹在顧僧舍

憶昔雙魚下日邊故人愁絕臥般川滄浪結佩三千里
風雨論交二十年鶴夢無端來帝里鳳池猶喜對神仙
應知旅客多疏放曲巷迴車尺五天
長安道上麴塵飛徒步歸來落日微展卷簷鈴聞梵唄
應門折簡駐驂駢如君自是臯夔侶老我依然薛荔衣
太息年來牢落甚相逢莫問北山薇

感懷

青驄白馬七萌車共說長安有狹斜縱使掃門客我輩
何勞夾轂問君家九衢人望黃梅雨三月風吹上苑花
沾得一樽燕市酒羈愁不必向天涯

所見

年少場中出五陵羽林千騎耀文繒橫塘逕仄仍盤馬
輦道風迴在臂鷹中壘遙來增氣色射聲初拜自飛騰
眼看雀尾堂堂去笑煞書生弱不勝

寄留仙希梅諸同人

清明時節杏花風有客南來類轉蓬駑馬自慙過冀北
神魚終羨奮天東故人詩酒遲經歲海國文章賴數公
此後還期俱努力聊齋且莫競談空

齊僖

任教五隸笑齊僖海上文章歷下生寄跡他鄉驚歲月

締交京國見人情青門花落遲遊騎紫陌春歸聽乳鶯
何日南回般水外溪雲山雨課秋耕

寄畢公權表弟時居夏里中

素車未得見容輝多病何堪臥寢幃老我風塵羞短褐
嗟君血淚灑麻衣北來驛路驚沙隔東望鄉關旅雁稀
京洛故人爲寄父遙憐骨立重欷歔

寄外交高司寇公

驅車三月到燕關千里驚沙變旅顏耆舊逢人懷謝傳
交游太息羨香山請看宛洛風塵地何似般溪水石閒
載酒堂邊秋色老便應遊子亦東還

驅車三月到燕關千里驚沙變旅顏耆舊逢人懷謝傳
交游太息羨香山請看宛洛風塵地何似般溪水石閒
載酒堂邊秋色老便應遊子亦東還

寄豹岩先生

志壑堂前柳色新渭城回首卽征塵故鄉千里仍憂旱
客裏三春苦耐貧北極交遊相問訊東山杖履自閑身
西風屈指長安道燕市南頭問酒人

歸孝儀學士招飲話舊

舊遊十載海東隅此日龍門愧顧厨君羨清溪濠上樂
我來皂帽府中趨旅堂對酒人如夢燕市論心意不殊

未得西窗同剪燭天街應避執金吾

悲歌

悲歌自昔傳燕趙擊筑聲中冷暮雲轟轟金臺思往事
蕭蕭易水到今聞西郊月印蜘蛛塔南苑風迴螞蟻墳
漫說有人求駿骨只今誰識望諸君

過天寧寺

廣寧門外碧嶽鄰偶到香臺問法輪花雨何人依淨土
蓮舟誰與渡迷津簷鈴風起聞天籟螭鼎煙消遠市塵
慙愧浮生過水日暫從細錫寄閒身

贈中州王聚五壽康

嵩嶽重深氣鬱蔥棄繻今又見終童羨君玉樹來河北
愧我蒹葭出海東禪室同看清夜月帝城愁對落花風
漢家最重凌雲賦肯使相如嘆未逢

送王聚五歸汲郡

燕市南頭易水深同來臺下問黃金風迴禁柳繫馳道
春老宮鶯出上林帝里忽驚萍蹟恨太行應繫故鄉心
他時長嘯蘇門外千里遙聞鸞鳳音

送李子英歸臨川

西江文字推前輩羨爾新篇滿帝畿振翼圖南遊子夢
鄉心薊北老萊衣長江逆浪三千里短棹乘風五月歸

總爲庭闈勞遠念征途遙指白雲飛

送歸惺崖先生請假返虞山

風流學士下蓬瀛賜沐恩深出鳳城六傳青門誇畫錦
九重紫閣待調羹文章太僕傳江左家學雲司重溪東
疏傅莫言高臥穩青宮虛左望先生
十年蓮燭傍螭頭驛路南國擁入騶儲相久虛銅鶴禁
拜麻應待鳳凰樓風雲路水初移權煙雨琴川暫下鉤
不獨故人思謝傅蒼生屈指入皇州

答豹岩先生里中來韻

河渠太史著書新尺素南來迥絕倫念我談經耶寄蹟
無緣賣賦可醫貧久從壯歲傷淪落敢冀遭逢到病身
此日太常將卒業賢良對策愧前人

得老父家書用前韻

書傳薊北字痕新故國迢迢隔暗塵雨足三農堪望歲
麥收十斛未全貧每懷捧檄平生志敢惜焚膏客裏身
却指白雲千里道經時猶作遠遊人

長安秋懷八首

長安陌上雨如絲雨後瀛臺玉輦移別館雲連雙闕影
上林花落萬年枝含煙鳥度新豐樹積翠香生太液池
獨坐腐儒未通藉逡巡不得到龍墀

同學驚看入紫微自憐猶着薜蘿衣
海隅道遠孤雲冷朔漠天高旅雁歸
老死蠹魚心未厭窮途羸馬意全非
棲遲興盡不歸去慚愧空山賦采薇

淒淒燕市正窮秋客子難消萬斛愁
九辯有誰憐楚調三閭聊可賦離憂
輕肥子弟驕僮父太瘦書生似隱侯
笑着荷衣向秋水般溪溪上有扁舟

大道朱樓十二重車書迢遞在塵中
萬年榆塞雙龍遠千里桑乾一逕通
御苑霜寒流壁月蘭臺秋老見雄風
可憐岐路飄蓬客誰許談天碣石宮

南來齊魯亦悠悠日下衣冠被九州
薦爽西山呈曉色迎寒北斗入殘秋
禁城王氣稱天府瀛海津門控上游
獨惜豪遊來勝地無端搖落莽生愁

槐里風雲掌上看居庸紫翠護長安
侍臣競進金芝頌天子新成竹籜冠
落落華陽終古事蕭蕭易水至今寒
誰知被褐紅塵陌難向天門振羽翰

帝闕崑崙接太清昆盧高閣瑞煙生
千官曉散雙梧掖入校風迴五鳳城
飲馬池邊飛鳥沒掠鷹臺畔暮雲平
畫生不識鳴珂路劫望龍門是玉京

薊門百里見重關御苑河流盡日閑
迢遞鳳樓瞻北極蜿蜒龍氣抱西山
石渠侍從忝同異國子書生數往還

咫尺九闈清蹕道玉顏天上幾時攀

反里後落第寄京師諸故人

依舊般溪老放民金臺無路問涓人
一千里外歸途遠

四十年來下弟頻雨雪空山成獨立
海濱茅屋故長貧

却瞻霄漢慙知己矯首天理釣綸

太皇太后大臨

丁卯十二月二十四日崩 戊辰
三十二首 戊辰正月詔到山東

旋宮黯黹接蒼旻返軫瑤池羽輅新
坐見哀音連海嶠

常留女則向楓宸昭陵雲隔三千里
蘭塔風生七十春

共道園扉施雨露赭衣引領哭宣仁

詩時營陵于馬蘭
峪大漸時行大赦

千秋壺德比虞唐此日乘風去帝旁
侍藥龍樓勞聖主

撤簾鶴髮痛周姜九重遺詔來窮谷
萬里悲雲下建章

不獨臣工思社飯普天灑淚泣媯皇

今皇純孝侍彌留泣禱郊壇俯冕旒
慈福宮中萱草沒

朝陽門外柰花愁百年家法垂銀管
一日靈旗拂宋旒

猶有遺音傳海內黃麻頒出大長秋

慈福宋 憲聖太
皇太后所居宮也

朝陽門即今齊化門時沿喪於此地
柰花故事皇后崩則人歌柰花也

三朝聖母乘龍墀大練宮中奕代師
紫氣寢門屯虎豹

翠微享殿守熊羆人從亦日思元祐
天為今朝震地維

去年九月

都中地震父老遺民倍惆悵淚沾九野
自漣洩

宋太皇
太后高

氏臨崩時賜
羣臣社飯

次蒲柳泉來韻

我亦愁人柰若何不堪羸馬每相過年來萍迹渾如夢
老去文章更入魔洗耳憐余歸隱暮回頭愧爾著書多
耦耕何日東臯下免使山靈久見呵

谷口

谷口先生麈鬚羣移家青磧遠塵氛窻前種樹依紅藥
枕上拈書看白雲欲向五湖稱漫叟敢言三徑似徵君
桃花流水人間世縱有仙源不可聞

青山

矯首青山自息機清溪猶有釣魚磯幾行煙樹圍平野
十里晴霞映翠微鷺向魚梁啣藻立人從樵徑荷鋤歸
野夫對此空塵慮不向人間問是非

余青園雜興

入門千畝自青青高閣無須陋室銘坐見園丁分鶴俸
閑從野老覓魚經種梅斜傍簷前石望月新添水上亭
花竹經綸良不惡移文何事此山靈
林際茅齋竹裏泉看山纔罷又高眠松聲終夜常疑雨
柳色連朝欲化煙除却吟詩皆俗累但能養拙卽神仙
羲皇以上尋常到長日方知是小年

臨臯閣閉眺

衆嶺迢迢望裏分畫欄極目對斜曛每從靜坐觀周易
忽見奇峯是夏雲積雨乍晴偏愛日故人偶別惜離郡
便思去逐巢居子蠻觸紛紛不可聞

積雨

空林積雨卧茅茨短髮蕭蕭自咏詩竹裏濕雲飛不去
松間明月杳無期生憎登閣蒼苔滑說到尋山蠟屐遲
向晚池塘增懊惱鳴蛙誰復辨公私

林卧

每從林卧觀無始寂寂不聞車馬喧過雨殘荷承露泣
迎秋病葉向風翻松蟠曲逕遮茅屋水漲平池沒蘚痕
漫道著書淹歲月一聲長嘯掩蓬門

七夕

金風颯颯敞清暉月照千家夜搗衣誰道含愁隣漢曲
浪傳緘怨下明機從來乞巧翻成拙終覺離多會尙稀
天上有情應亦老免教鳥鵲入雲飛

與王克三小飯

太息離居各一方經時握手暫相將淒淒促織鳴東壁
落落晨星聚北堂午夜商歌傾魯酒秋來蓬鬢惹吳霜
相看伏歷思千里擊碎琅玕淚數行

憶山居

石戶之農天一涯每從塵世想煙霞蕭蕭幽谷長鑿柄
落落疏籬扁豆花曲逕入虛高士駕卜隣空傍野人家
便思去著潛夫論甘逐漁樵老歲華

戊辰雜詩

危言郭泰漢東京從此長留世上名抗疏九霄迴日月
引居雙闕動公卿甘陵南部稱鈞黨折檻中朝托死生
聖主轉圜真盛事不教李蔡玷鈞衡

炙手炎蒸不可論九重虎豹守天門厨居恨不歸東市
丞相何勞賜上尊張禹全生逢盛世王嘉不死亦君恩
尙方借劍雖無濟珍重朱雲亦敢言

軍書昨日發燕關聞道興師破竄顏列校飛弧趨瀚海
羽林投石響天山嫖姚夜度三千里藉藉風生十二閑
指日柔然應稽首谷蠡亦就紫宸班

河隄使者秦龍蛇壁馬銷沉莫怨嗟赤壤一時歸虎旅
黃金百萬葬鳧鳧沙銅符夜索三河竹桃浪春浮二月花
聞道都船方下詔金雞又早賜天家

海內軍書共一家何來井底有鳴蛙三湘明月懸清晝
七澤鯨鯢偃碧沙屈指樓船迴大旆已看下瀨奏清笳
獨憐烽火艱難地紅袖青裘白鼻騮

憶都門舊遊

誰教輓輅擁柴車
司馬門前誤上書
汝穎生徒高太學
秦川公子冠黃初
歸來東海尋煙駕
笑向南山結敝廬
莫漫窮途悲潦倒
雲房猶自伴樵漁
直北紅塵萬里看
若爲風雨憶長安
揚鞭曉度芙蓉苑
縱酒春歸芍藥欄
天上故人時解佩
眼中逋客亦彈冠
掉頭巢父仍歸去
無恙珊瑚拂釣竿
偶隨騏驥過幽州
蹴躡塵中賦倦遊
不慣掃門稱上客
誰能長揖謝通侯
一年羈旅生離恨
千里風煙上敝裘
幸有鍾山草堂在
蕭然清嘯海天秋
病渴無緣金掌露
不堪回首鳳凰城
承明仙客依金闕

上苑秋風動石鯨
浪迹幽燕成底事
側身天地是餘生
荆高徒旅今何在
夢裏猶聞擊筑聲

紫陌桃花隔絳霄
風塵漾漾路迢迢
洛陽計吏誰相問
稷下狂生不見招
作客憶餐牛炙美
探奇未惜馬蹄遙
禁城落日蓮花水
只是難忘玉蝀橋

小築

十載經營托近郊
野人小築傍林梢
爲園恨不先栽竹
結屋無如但覆茅
閑愛魚兒依密藻
輸他燕子卜新巢
淮南叢桂他年事
翻笑營峯象二嶠

村居

蔣詡移家對碧岑惟餘二仲一相尋
春秋花鳥桃源曆朝暮煙霞栗里心
籬下蓬蒿遮小徑溪頭流水奏鳴琴
此生端合棲岩壑莫漫悲歌梁甫吟

臧子招同鄰侯宿尚友齋

四座相看倒接籬香生叢桂拂葳蕤
淮南賓客容疏放硯北琴書自陸離
投轄呼盧朝中酒當筵巾角夜彈碁
君家五斗真雄辯乘興還來過習池

寄柳泉誠夫

落梅時節過東籬握手匆匆有所思
何事殘秋未相見况聞哀雁不勝悲
期君吏部牀頭酒讀我長安客裏詩
媿節堂中霜月冷等閒又負菊花枝

寄東阿心友弟

長安花落拂春衣與爾橫經向虎闥
燕市風高精舍隱薊門秋老倦遊歸
何時一遂論心約隔歲驚聞旅夜飛
命駕無妨千里道般溪猶有釣魚磯

紀事

武昌夏逢龍之變盡節者惟葉公映榴一人

夏口從來控上游潢池亦是廟堂憂
襄陽凱奏銅蹄馬鄂渚煙消青翰舟
漢關重頒司隸法湘離一洗楚臣羞
惟餘罵賊孤忠血添作清江萬古流

題諸暨令葉存菴挂冠歸田卷子

潯陽江畔有柴桑陶令歸來菊徑荒五柳莫須貪五斗
三閭聊可賦三湘千年梅福棲吳市此日逢萌重海方
回首苾蘿溪上水湖頭煙雨亦茫茫

仲沼招飲看海棠

麝脂經雨露光薄尊酒名花結古歡白雪樓前開玉蕊
烏衣巷裏敞珠欄尚留西府三春色恐逐東風一夜寒
何似清平傳絕調沉香亭子捲簾看

題傲樊堂贈載績年伯

五柳先生早拂衣漢陰抱甕久忘機千章灌木屯青靄
十里春山落翠微蘭畹盈盈當檻出鳥聲寂寂背林飛

申屠老屋常因樹茶皂繩牀願不違

栗里桑麻映草亭桃源雞犬亦冥冥十年種樹重陰碧
半榻看山一帶青靜愛蜂衙拖菜甲閑分魚俸課園丁
浣花溪畔堂成後慚愧新題陋室銘

青藤白恰步斜曛靜裏爐香手自焚梧幾宋人雕玉葉
荷衣楚客佩蘭薰花如錦帳翻紅藥松作龍鱗宿白雲
自是鹿門高臥穩不教猿鶴怨徵君

黃綺衣冠出世塵閑從野客拂苔茵落花無語人如菊
怪石當階月似銀陶令巾車時命駕袁闕土室不關貧
襄陽耆舊花陽誌帳裏新篇授幾人

時以所著滯乘徵見示故未句及之

和石髮隱居

當年把臂向崑崙此日淮南客自尊
愧我蕭條賚季子隣君憔悴病文園
十年白髮名心淡片石寒山雅道存
谷口歸來不相見雲中長劍倚天門
真人昨歲久東行愁聽春山過雁聲
空館寒雲留客夢落花細雨動離情
共言居士真移履誰說龐公不入城
翹首武陵知不遠人間何事浪相驚
長嘯孫登出碧林雲中鸞鳳奇靈音
文章窮老翻成拙出鬼揶揄久見侵
蘭澤千年悲叱際鹿門百里費招尋
從今夢冷長安道九辨因君作楚吟

漫隨法駕鬪新聲近日偏傷抱玉情
懶向齊門仍鼓瑟欲携秦女坐鳴箏
三年結屋黃茅隱十畝爲園碧草生
藉問靈均何太苦芳洲渺渺塞香蘅
天外層巒久閉關山中薇蕨畫長閑
書來栗里三春日人在桃源第幾灣
出岫閑雲行復住乘風老鶴去仍還
何時共話巴山雨一使愁山暫解顏

題余青園竹

今日重來見此君幽篁無恙遠塵氛
萬竿近水亭斜日千畝當樓宿夏雲
渭曲陂前留翠色簟簞谷裏散清氛
安能却見洋州筆貌得龍孫迥出羣

題百脈泉

一名珍珠泉

千年龍窟對禪扉無恙珠璣百道飛十里江源拖素練
滿天花雨濺苔衣文魚逆浪歸晴沼白鳥忘機下翠微
安得結廬隣勝地來遊徒倚憺忘歸

誰闢方塘護翠瀾平池迸地下前灘龍宮浩劫浮雲衛
鮫室晴光落月寒萬斛明珠生合浦一泓綠玉浸琅玕
何如來鶴橋頭水御墨淋漓照激湍

晤孫子未太史話舊

沽酒華陽送客歸長安道上冷雲飛相如彩筆皆言好
曼倩金門正苦饑暫遠九重天祿閣遙從千里老菜衣

和歌燕市人猶在却共滄洲理釣磯

暢春苑裏憶題詩一日聲名輦下知曙影早朝歸瑣闥
珠光寒月照昆池承明厭薄來三殿子舍棲遲又一時
今日侍臣蕭瑟甚卜居遙向繡江湄

余青園立秋

秋到園林暑氣消漸看綠樹已蕭蕭梧桐一葉飄金井
明月三更弄玉簫畫閣雲封迷夜色繡江雨過漲新潮
萬家砧杵行將動好爲羈人伴寂寥

秋日讀離騷

銀牀葉葉雨聲多我亦言愁奈若何挹露寒塘瑤瑟怨

倚天長劍楚臣歌
佳人日暮依修竹
山鬼秋來帶女蘿
重讀懷沙頻弔古
蕭蕭短髮自婆娑

偶倣義山

天外層城近日邊
芙蓉爲苑玉爲田
夢回瓊島三千里
心逐雲和五十絃
薜荔風高悲楚客
蒹葭霜落對秦川
生憎綠鬢人將老
猶抱遺經亦可憐

江村

江村長夏林亭幽
客子齋居無所求
寂寂琴牀幾搔首
盈盈松月來當頭
萬竿脩竹不知暑
滿地蒼苔初入秋
何時藜杖漫歸去
長嘯元龍百尺樓

和石髮隱君

紅塵回首事全乖
老向溪山散古懷
七十行歌人帶索
千年大隱姓難埋
魚書爲訊層城客
土室新題浣石齋
借問生涯何處是
碧藤白恰伴青鞋
岫山天外碧峯尖
霜落風高朔氣嚴
昌谷一夢驚李賀
長城五字傲蒙恬
和煙剝竹歸荒圃
向日攤書愛短簷
自古昇沉俱莫定
百錢何必更垂簾
草堂何用更移文
爲羨滄洲鷗鷺郡
叢菊當窻收野色
大槐欹枕夢閑雲
幽人開徑三秋晚
稚子蔬泉百道分
不是龐公厭城市
碧山猿鶴戀夫君

逃禪林際是耶非
常恐徵書下瑣闈
洞壑常爲煙月主
江天新製芰荷衣
秋來放鶴閑情淡
老去裁詩任意揮
笑我空齋經術客
十年坎壈素心違
羲皇以上是何人
每爲相逢愧爾真
黃菊把來將進酒
青松手種已成鱗
人傳用里猶如舊
自到桃源不記春
老友惟君成碩果
甘泉回首共傷神
寄愁天上
有誰喚欲向空山
一卜隣
賈誼三湘悲莫盡
劉蕡終古氣難伸
繡江漠漠秋光老
白嶽青青黛色勻
念我窮途何自苦
步兵依舊阮家貧

再用前韻寄懷雪崖

細細乾坤願已乖
惟餘林麓寄幽懷
炊煙每共秋雲捲
奇石常爲碧蘚埋
習靜豈緣叅繡佛
宋薇聊復作長齋
相逢爲問朱居士
曾否當年業織鞋

蛾眉山上幾峯尖
知爾沉冥似蜀巖
釋雪烹來耽寂寞
黃庭讀罷愛虛恬
何妨茅屋隣山鬼
莫使蓬門近畫簷
寵辱不驚今已久
逢時安問夜明簾

槐村一老喜論文
瀟灑清標迥出群
延客兒童招野鶴
忘機鷗鳥泛溪雲
幽居入畫層層見
樵路看山細細分
多病不緣明主棄
敝廬終古憶徵君

人間萬里計全非
杖策何曾到虎圍
世事到來真蝶夢

儒冠無用泣牛衣且持樽酒臨風醉勝有殘戈向日揮
寄語山中學道者等閑莫使寸心違

果然大有避秦人谷口猶聞鄭子真五斗風前開菊徑
九歌聲裏寄文鱗野夫爭席寧知老毛女相隨定幾春
欲向空山探秘籙靈威踪蹟總疑神群狙從教任喜噴
清風好月自爲隣山魃且復同吟嘯塞馬憑誰問屈伸
浩劫千秋愁裏度蒼煙九點望中勻問天搔首天無語
自古騷人合賤貧

庚午春日哭畢公權表弟墓下

丁卯在都門聞公
權訃庚午十七首

驅馬風前夕日昏手披宿莽弔寒原一千里外逢搖落

四十年來托弟昆天上有樓成玉闕人間無路問松門
欲將一片韓陵石寫向延陵灑淚痕

冥冥造物迥難分地下交遊苦憶君山色淒涼頻入夢
松聲彷彿共論文千秋遺恨歸荒草十里悲風捲暮雲
車過豈緣憂腹痛獨來隕涕向孤墳

洛陽年少竟蹉跎浮世驚聞薤霧歌所地有懷悲叱際
問天無語淚滂沱當時知己晨星少自古才人賚恨多
試向青龍山下望深深埋玉怨如何

愁雲黯淡野棠開憔悴今朝賦七哀非是世人皆欲殺
却疑上帝不憐才琴叟叔夜歸黃土劍挂徐君拂綠苔

痛絕山陽三載後名心爲爾總成灰

庚午下第感遇十二首

不向桃源覓隱淪黑貂零落意逡巡三年下第仍如故
萬卷攤書未是貧何必窮途悲阮籍莫因憔悴哭靈均
歸來丘壑容疏散終覺青山不負人

落葉西風萬木凋就中客子更蕭條淒涼屢別陵陽足
消瘦深憐楚女腰駑馬千群容爾傲戰場五色向人驕
生平不作阿房賦爛醉松窻慰寂寥

南山歸臥正高眠滄海珠沉意黯然憤世幽懷休感慨
逢時文字入神仙伴他紅勒三千卷笑我青燈四十年

同學相看俱老大無人先着祖生鞭

東壁掄材棘寺開風塵十載嘆無媒劉蕡痛哭仍多事
溫憲違時自不才壯志久看銷欲盡浮名回首已成灰
惟餘三畝羅含宅策杖看雲日幾回

雄雄獵獵振東陲鰲背難攀桂樹枝自笑鼓篋齊客技
誰憐抱玉楚臣悲金門又阻賢良策黃絹休誇幼婦辭
猶喜吳陵門下士有人走馬曲江池

西風縹緲隔瀛洲醉裏題詩豐樂樓自是江淹無彩筆
非緣伯樂失驂騮漫勞月窟探珠貝只合桐江擁黑裘
賴有故山山下路手招猿鶴任悠悠

天問何須向楚湘久知安穩秀才康鹿胎高髻無新製
虎觀逃名有秘方但使雄文驚永叔自然神駿遇孫陽
太平此日收賢雋馬淳牛溲入藥囊

孫山山外姓名高辜負龍賓映彩毫琬琰虛傳三獻玉
驪黃安得九方臯文章留與教兒輩面目依然是我曹
四壁琴聲人寂寂惟堪一醉打醪醕

平生磨蝎自蹉跎舊例何妨泣下和騏驥長鳴太行路
鳳凰饑死玉山禾丁稜有術登科早宋五田來坦率多
畫得牡丹成棄擲臙脂雖麗不如他

茁軋寧能亂典墳心傷牛驥且同群虞翻骨相生前定

蔡澤輕肥未足欣魂斷鹽車迷隴坂眼看蒼狗變浮雲
蘿衣蕙帶終堪柳汁何煩九烈君

虎豹狺狺下九閭手憑玉尺自言尊笑他倦鳥思珠樹
亦有枯魚羨禹門松徑到頭終息影羊腸何事未迴轅
極知賦命真涼薄物故從來不可論

傷心貢禹安彈冠路隔雲霄鍛羽翰老馬長嘶青絡索
唾壺擊礪碧琅玕持衡浪說懸秦鏡緱佩誰知刈楚蘭
屈指青陽逼歲暮蕭蕭雨雪臥袁安

簡希梅

嗟余折臂如羊祐墮篤憐君病亦同辛苦幸餘舌尚在

飛揚依舊氣何雄，但令彩筆江花粲。便掇青綾玉腕紅，
紅使詞場推老手。莫教人說兩衰翁。

西崑二十首

辛未

萼綠仙人試碧簫，鳳凰斑管爲誰調。盤螭約背金條脫，
彩燕當頭玉步搖。夫壻封侯依紫塞，兒家姓字寄紅橋。
寧知此夜遼西夢，空惹啼痕在絳綃。

萬年金井碧梧桐，五鳳爭飛曉日中。霄漢雲開仙掌綠，
含桃花發上林紅。昭陽歌罷辭前殿，長樂春深托守宮。
不及青青芳草色，猶從輦路漾東風。
內信傳來理翠翹，絲絲宮柳學纖腰。鸞車路遠愁無那，

鳳脰燈寒淚未消。結綺自纏金屈戌，沙棠苦憶木蘭橈。
生憎不似揚州估，日日江邊弄晚潮。

當時解佩向芝田，漢曲明珠劇可憐。怨入鴟絃成百結，
愁隨堤柳已三眠。樓頭望斷新豐樹，夢裏人歸勑勑川。
種得女蘿千萬尺，爭教絲子不纏綿。

鬱金堂上簇紅霞，曲曲迴廊是妾家。把酒每歌三婦豔，
出門同駕七胡車。鵲鵲並浴銀塘水，荳蔻初開玉砌花。
昨日贈詩驚彩筆，芙蓉鏡裏對秦嘉。

碧紗窻外夜烏棲，梧葉銀牀露井迷。舊曲長干傳白下，
新妝短棹過青溪。芙蓉一帶田田出，鸚鵡雙飛啞啞啼。

莫向西洲洲上路恐令紅袖濕香泥

誰從天外問靈修沅芷湘蘭未可求中婦當筵歌捉搦
丈人下直聽笙篴葳蕤欲閉黃金鑰纖指真藏碧玉鈎
對酒緣何忽不樂難尋大藥向丹丘
綠楊如黛雨如煙萬斛離愁正黯然朱鳳紫鸞歌楚調
清溪白石唱神絃驚垂銀蒜成孤枕慣擲金釵作卜錢
潮去潮來何所似兩行紅淚夜涓涓
崑丘渺渺片雲輕西指咸池萬里行笑倚鳳鸞秦弄玉
偶遺龍鮓許飛瓊消盤無恙桑田綠若木遙連蜃氣清
安得乘風招八駿芙蓉城畔理瑤笙

金屋何人共瑣窗銅槃蠟燭影幢幢懶排雁柱調銀甲
自劈鸞箋對玉缸漫說琅耶臨大道絕憐桃葉渡寒江
縱饒沾得宜城酒百丈愁心未易降

王母西來曉露濃碧城隱隱月溶溶雲中懸圃三千里
天畔瓊樓十二重手種桃花多歲月自尋瑤草飼鸞龍
雙成已到人間否海水枯時定一逢

麗日當樓映碧紗橫塘塘外是儂家攀條怕折相思樹
鬪草時尋解語花睡鴨一簾香篆細霓裳三疊舞衣斜
妝成獨自矜新樣人道夷光出若耶
銀箏象管在前頭羞煞盧家有阿侯子夜歌中悲永夜

莫愁湖上起新愁，金閨破夢三更雨。璧月窺人十二樓，
便似星橋終古恨。絳河一水隔牽牛，玉階花發蕙蘭叢。
惆悵惟餘賦惱公，日照秦樓桑采采。雲歸巫峽雨濛濛，
雙蛾淺黛傷心碧。兩頰微潮印脣紅，清晝坐看刀尺倦。
戲調鸚鵡畫簾東，桂梁燕子語呢喃。顛雜離心百不堪，
紅粉盈盈師素女，碧綃剪剪佩宜男。鮪人迸落千盤淚，
園客新成八繭蠶。西曲上聲聽不得，可知春恨在江南。
珠樓別苑起明霞，璧帶風飄玉樹花。萬頃愁深縈五夜，
九迴腸斷似三巴。宮鶯弄舌同翻調，海燕銜泥尙認家。

蕩子不歸春色暮，陌頭煙柳幾行斜。

雲母屏風織錦機，江妃憔悴玉兒肥。偶撚紅豆拋歌扇，

閑弄青梅濕苧衣。微雨因風當檻入，落花如雪隔簾飛。

相逢莫問蘼蕪草，春事闌珊正夕暉。

綺疏阿閣五雲端，青雀西來濕露盤。共道秦宮花底活，

却教楚舞掌中看。流黃機畔砧聲亂，翡翠樓頭月影寒。

我有相思不相見，錦堂北斗已闌干。

傷心七十二鴛鴦，携瑟無人近玉牀。月照碧梧驚曉夢，

風翻紅柏落微霜。九秋蟬韻同嗚咽，三峽狹啼更斷腸。

慚愧江湖猶有信，爭如薄命嫁王昌。

百寶流蘇織錦茵雕欄綺席淨無塵夢中神女真疑楚
陌上羅敷舊姓秦鸞羽九霄遺玉珮雲車五夜碾香輪
自從一入青閨裏花落花開不見人

花朝見月

每從爛醉覓生涯客裏年年老歲華春色掩人如有恨
花朝憐我未還家海棠欲放凝紅豆社燕驚飛入絳紗
二十四番芳信好故園離落隔煙霞

思家家在碧山頭策策輕寒上敝裘春色平分人中酒
良宵真見月當樓露桃封萼猶含凍煙柳迎風已漸柔
道是花朝花不見錦堂誰爲理空篔

見白髮

拊髀空憐五十秋二毛種種苦相求誰言白髮無公道
坐使青山起暮愁淡淡吳霜侵短鬢星星朔雪漸盈頭
不知鏡裏三千丈朝夕催人可自由

寄孫孝堪光祿雀覲歸里

金臺三載悵離憂此日鳴鞭下薊丘北闕恩波暫休沐
西 明月可淹留携來法酒呈萱砌新製斑衣出鳳樓
多病故人遲握手未能策蹇瀟橋頭

寄鍾聖輿

一從偃蹇臥東臯回首湖山愧我曹司戶陳書天闕迥

山陰言集
陵陽隕涕楚雲高秦州門下風初盛歷下亭邊夢亦勞
爲語空齋鍾士季何時一醉共醪醕

題唐文奎臨蘭亭

華陽館裏臨池日爲我揮毫對綺疏狸骨奇方應不忝
戢山團扇定何如誰言禊帖同金谷寧信昭陵葬玉魚
千古會稽王內史風流猶寄數行書

花朝後十日偶題

平蕪芳草亦迢迢惆悵王孫意寂寥頌酒未能傳酒德
看花何必定花朝海棠風急紅霞綻提柳煙深綠帶飄
屈指清明知不遠尋春寧惜馬蹄遙

題陶隱居傳後

東白先生似許由金籠不肯作犧牛山中宰相無榮辱
嶺上閑雲任去留刀匕丹砂還大藥銀鷹彩筆寫滄洲
華陽自古稱真逸寧覺頑仙駕赤虬

寒食道中

壠麥青青青可憐昨朝新雨灑平田神鴉欲散寒原下
社鼓時鳴古佛前楊柳渡頭絲作慢杏花村裏玉爲煙
客心搖落清明節百里歸來正著鞭

皂帽年年老管寧每因行役罷談經山頭野燒連天碧
溪上莓苔入眼青幾點飛鴻來遠塞數行新柳覆寒汀

桑田沾濕春耕好便欲重題喜雨亭
橫塘小逕轉悠悠蝶躩驅車笑故裘春水綠如鸚鵡翼
晚山青比黛螺頭平燕望斷王孫草極浦香生杜若洲
獨有客心驚歲月一年春事付東流
繡江南望見晴嵐萬仞岫山若劍鐔柳不勝雅初放綠
水纜浴鷺已拖藍家鄉入眼依般左煙景愁人似渭南
杳杳征途自來去何如棲息傍瞿曇

和王村店壁石髮舊韻

谷口年來鄭子真逃名世外迥無塵
嶺頭雲氣誰堪贈溪畔桃花不見人
養拙惟宜山水僻愛閑偏與鷺鷥親
鍾期久已留遺響壁上猶餘絃外音

笠山

笠山茆屋枕溪濱靜裏名香只自焚
隱幾居然吾喪我狎鷗真與鳥爲群
塔前愛植數竿竹嶺上閑隨一片雲
頗有故園三徑在幽人常得佩蘭薰

七律三
揚春

山
山
言
集



書